

Shon Fia No a Muri!

“No ta fia akinan.” “Fiamentu ta krea enemistat.” “Shon Fia a muri!” Avisonan asina ta visto na diferente negoshi. E komersiante ku a kima dede, no ta dispuesto pa ríska fia atrobe.

Debe ta un problema serio...especialmente pa e debedó! Straño ku por parse, debe a bira mas komún tempu ku nos tabatin mas sèn. Awor ku nos isla tin problema ekonómiko, debe a para bira un laso chokante rònt di nos garganta. Nos asta ta tende di mucha ku no tin kuminda...pa motibu di debe.

Sigur televishon ta habri nos apetit pa kos material. Mirando e propaganda, nos ta konvensé ku nos por sobreviví ni un ratu mas sin e artíkulo propagandá. E programanan ta presentá un estilo di bida mas luhoso ku nos konosé. Nos wowo ta habri. Nos tambe ke biba asina—na grandi—asta si esei lo nifiká ku nos gastunan ta surpasá nos entrada.

Un preshon adishonal ta bin ora nos ta kompará nos mes ku otronan. Nos ta deseá loke nan tin. Dios den un di e Dies Mandamentunan ta bisa “*No kudishá...nada ku ta pertenesé na bo prohimo*” (Eksodo 20:17). Ma nos ta preferá ignorá Skritura i ta hinka nos kurpa den debe. Si bo bisña tin kabel, bo tambe mester tin. Mayornan ta invertí miles di florin, i asta ta saka fianza, pa pone un fiesta di Promé Santa Komunion mes luhoso ku un kolega. Pa motibu di amigu, bo tambe mester kubrí flur ku tapèit, kumpra outo mas luhoso, bisti yunan ku sierto marka di paña, èts.

Kompa Leon, Maestro, i Visa ta palabranan ku a bira un parti di nos vokabulario diario. Ku un karchi chikitu den bo poseshon, bo por disfrutá di un sistema nobo di biba! Bo por gosa awor, instantemente, sin mester paga...ainda! Ma “gosa awe, paga mañan” ta solamente un ilushon ku ta posponé e realidat ku bo **mester paga!**

Antes, hopi hende a konstruí nan kas segun nan forsa. Nan a pone fundeshi i a sigui traha te ora sèn a kaba. Ora plaka a rende, atrobe por nota un adelanto den e konstrukshon. Awendia poko hende ta haña e plan ei aseptabel. **Nos no por warda pa sèn rende.** Purá nos ta saka un fianza, anto ta lucha pa añanan—asta **dékadanan**—pa kita e peso di debe for di nos lomba.

Nos por argumentá ku un kas ta un nesidat di bida i pues un debe nesario. Ma na nos isla tambe tin kaso tristu di hende ku apenas por paga pa awa i koriente, ma tòg ta insistí pa saka fl. 65 kada luna—fl. 780 kada aña—pa kabel. Prioridatnan kompletamente bruhá!

Ma sea ku bo debe ta apropiá òf irresponsabel, ta un echu ku debe ta karu. Imaginá un famia ku kada luna tin fl. 83,33 mas gastu ku entrada. Kada aña nan lo mester saka un fianza di fl. 1.000 pa kubri e debe aki. Si nan sigui akumulá debe adishonal di mil florin kada aña pa dies aña sigui, na final di dies aña nan lo a fia fl. 10.000. Si nan mester paga 10% interes, nan ta haña un shòk ora nan ta realisá ku nan tin ku paga fl. 15.500 pa sali for di debe!

Beibel ta bisa “*Duna tur hende loke boso debe nan...no debe ningun hende nada*” (Romanonan 13:7-8). Dios tin rason. Ta muchu mas fásil pa hinka bo kurpa den debe ku e ta pa sali for di debe. Algun hende ta koba un buraku di debe asina hundu ku ta bira kasi impusibel pa sali. Maske por tin kasonan ku debe ta nesario, **ta mil bes mas mihó pa no hinka bo kurpa den e buraku di debe pa kuminsá si por evitá.**

“*...e fiadó ta bira esklabu di esun ku ta fi'é*” (Provèrbionan 22:7). Si nos komprendé bon loke e Skritura aki ta bisa, tempu di katibu no a kaba ainda na nos isla. Hopi hende ta katibu di banko òf e negoshi fo’i kua nan a fia. Talbes pa algun hende, Shon Fia a muri. Ma pa otronan, Shon Fia ta bibu bibu. Nan ta su katibu, i kada dia nan ta haña un halá di sota kruel na su man.